



PATNUBAY SA MISA

7 Pebrero 2016

Ika-5 Linggo sa Karaniwang Panahon

Taong K

LINGGO NG PAGPAPAHALAGA SA BUHAY

Mga Kabahagi sa Misyon ni Kristo

Ngayong ika-5 Linggo sa Karaniwang Panahon, saksi tayo sa isang mahimalang huli ng isdang sumasagisag sa misyon ni Hesus na magligtas sa sangkatauhan sa kasamaan.

Sa bawat henerasyon at pamayanan ng mga mananampalataya, patuloy si Hesus, ang Dakilang Mamamalakaya, sa pag-aanyaya sa mga tao para makibahagi sa kanyang misyong pagliligtas sa mga tao sa lahat ng anyo ng kasamaan. Kailangan ang pagkabukas-palad at pagsusumikap sa pagtugon sa paanyaya ni Hesus.

Sa Eukaristiyang ito, lalung-lalo nating ipagdasal na lahat ng tinatawagang gumanap sa ganitong tungkulin ay bukas-palad at tapat na makatugon hanggang sa wakas ng panahon.

Ngayon di'y "ARAW NG PAGPAPAHALAGA SA BUHAY." Lahat tayo'y tinatawagang magpapahalaga at magtanggol sa buhay. Sa pagdiriwang ng Eukaristiyang ito, alalahanin natin nang may paghanga at pasasalamat ang lahat ng kalahok sa kilusang nagpapahalaga sa buhay at masugid na nagtatanggol sa ano mang laban sa buhay.



PASIMULA



Pambungad

(Ipahayag lamang kung walang awiting nakahanda.)

Halina't ating sambahin ang Diyos na Poon natin. Lumuhod at manalangin sa Manlilikhang butihin. Siya'y Poong mahabagin.

Pagbati

P –Papuri't luwalhati sa Diyos Amang sa pamamagitan ng Espiritu Santo ay nagsugo sa Kanyang Anak upang maging Guro at Tagapagligtas natin. Ang Kanyang grasya at kapayapaan ay sumainyong lahat!

B –At sumaiyo rin!

Pagsisisi

P –Mga kapatid, sa paghahanda natin para sa pagdiriwang ng mga

banal na Misteryo, alalahanin natin ang ating pagkakasala at hilingin sa Panginoon ang kapatawaran at lakas. (Manahimik saglit.)

P –Naparito ka upang ipahayag sa amin ang Pag-ibig ng Ama. Panginoon, kaawaan mo kami!

B –Panginoon, kaawaan mo kami!

P –Naparito ka upang ilitgas ang sangkatauhan sa trahedyang kapahamakang walang hanggan. Kristo, kaawaan mo kami!

B –Kristo, kaawaan mo kami!

P –Pinangakuan mo sina Simon Pedrong gagawin mo silang mga mamamalakaya ng mga tao. Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B – Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarantal ka namin, sinasamba ka namin, ipinagbubunyi ka namin, pinasasalamatang ka namin dahil sa dakilang mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang

Kataas-taasan, kasama ng Espiritu Santo sa kadakilaan ng Diyos Ama. Amen!

Panalangin Pambungad

P –Ama naming makapangyarihan, lagi mong lingapin at patnubayan kaming mga kabilang sa iyong angkan. Sa tanging pag-asa naming ikaw ang nagbibigay, kami’y tangkilikin mo at laging subaybayan sa pamamagitan ni Hesukristo kasama ng Espiritu Santo magpasawalang hanggan.

B –Amen!

PAGPAPAHAYAG NG SALITA NG DIYOS



Unang Pagbasa *Isa 6:1-2a.3-8*

Tinawag si Isaias para maging propeta matapos niyang malasap ang kabanalan ng Diyos at mapag-isip niya ang kanyang mga pagkakasala. Ang pagsusugo ng Diyos ng isang anghel ay naglinis sa kanya sa kanyang mga sala at nagbigay-lakas para sa kanyang misyon sa bayang Israel.

L –Pagpapahayag mula sa Aklat ni Propeta Isaias

Nang taong mamatay si Haring Uzias, nakita ko ang Panginoon. Nakaupo siya sa isang napakataas na luklukan. Ang laylayan ng kanyang damit ay nakalatag sa buong Templo.

May mga serapin sa kanyang ulunan, at bawat isa’y may anim na pakpak. Wala silang tigil nang kasa-sabi sa isa’t isa ng ganito: “Banal, banal, banal ang Panginoong Diyos ng mga hukbo! Ang kanyang kaniing-ninga’y laganap sa sanlibutan.” Sa lakas ng kanilang tinig ay nayanig ang pundasyon ng Templo at ang loob nito’y napuno ng usok. Sinabi ko, “Kawawa ako. Marumi ang aking labi at naninirahan sa piling ng mga taong marurumi rin ang labi. Mapa-pahamak ako pagkat ako’y isang makasalanang nakakita sa Panginoon, ang Makapangyarihang Hari.”

Pagkatapos, may isang seraping sumipit ng baga sa dambana, at lumipad na patungo sa akin. Ang baga ay idiniit sa aking mga labi, at sinabi, “Wala ka nang sala. Napawi na ang mga kasalanan mo.”

Narinig ko ang tinig ng Panginoon, “Sino ang aking ipadadala? Sino ang aming susuguin?” Sumagot ako, “Narito po ako. Ako ang isugo n’yo.”


Ang Salita ng Diyos!

B –Salamat sa Diyos!

Salmong Tugunan *Awit 137*

B –*Poon, kita’y pupurihin sa harap ng mga anghel!*

R. M. Velez



* **Ako, Poon, buong pusong aawit ng pasalamat, sa harap ng mga anghel, pupurihin kitang ganap. Sa harap ng iyong templo ay yuyuko at gagalang, pupurihin kita roon, pupurihin ang ‘yong ngalan.** **B.**

* **Dahilan sa pag-ibig mo at sa iyong katapatan, ikaw’y tunay na dakila, pati iyong kautusan. Noong ako ay tumawag, tinanggap ko ang tugon mo, sa lakas mong itinulong ay lumakas agad ako.** **B.**

* **Dahilan sa pangako mong narinig ng mga hari, pupurihin ka ng lahat at ikaw’y ipagbubunyi. Ang lahat ng ginawa mo ay kanilang aawitin, at ang kadakilaan mo ay kanilang sasambitin.** **B.**

* **Nahahandang harapin mo mapusok kong kaaway, ligtas ako sa piling mo, sa lakas na iyong taglay. Yaong mga pangako mo ay handa mong tupding lahat, ang dahilan nito, Poon, pag-ibig mo’y di-kukupas, at ang mga sinimulang gawain mo’y magaganap.** **B.**

Ikalawang Pagbasa *1 Cor 15:1-11*

Sa Corinto, may ilang nag-alinlangan sa muling pagkabuhay ng mga yumao sa wakas ng panahon. Nagbigay ito kay San Pablo ng pagkakataon para muling ipahayag ang mga pangunahing katotohanan ng pananampalatayang Kristiyano at lalo na ng muling pagkabuhay ni Hesus – ang pangunahing katotohanang batayan ng muling pagkabuhay ng lahat ng mananampalataya.

L –Pagpapahayag mula sa Unang Sulat ni Apostol San Pablo sa mga Taga-Corinto

At ngayoy ipinaaalaala ko sa inyo, mga kapatid, ang Mabuting Balita na ipinangaral ko sa inyo. Iyan ang pahayag na inyong tinanggap at naging saligan ng inyong pana-

nampalataya. Sa pamamagitan nito’y naliligtas kayo, kung matatag kayong nananangan sa salitang ipinangaral ko sa inyo – liban na nga lamang kung kayo’y sumampalataya na di iniisip ang inyong sinampalatayanan.

Sapagkat ibinigay ko sa inyo itong pinakamahalagang aral na tinanggap ko rin: si Kristo’y namatay dahil sa ating mga kasalanan, bilang katuparan sa nasasaad sa Kasulatan; inilibing siya at muling nabuhay sa ikatlong araw, ayon din sa Kasulatan; at siya’y napakita kay Pedro, saka sa Labindalawa. Pagkatapos, napakita siya sa mahigit na limandaang kapatid na nagkakatipon. Marami sa kanila’y buhay pa hanggang ngayon, bagamat patay na ang ilan. At napakita rin siya kay Santiago, saka sa mga apostol na sama-sama noon. Sa kahuli-huliha’y napakita rin siya sa akin – bagamat ako’y tulad ng batang ipinanganak nang di-kapanahunan.

Sapagkat ako ang pinakahamak sa mga apostol, ako’y di karapat-dapat tawaging apostol, sapagkat inusig ko ang simbahan ng Diyos. Ngunit dahil sa kagandahang-loob niya, ako’y naging apostol, at hindi naman nawalan ng kabuluhan ang kaloob niyang ito sa akin. Nagpagal ako nang higit kaysa kaninuman sa kanila, bagamat hindi ito sa sarili kong kakayanan kundi sa tulong ng Diyos sa akin.

Kaya’t maging ako o sila – ito ang ipinangangaral namin, at ito ang pinananaligan ninyo.

Ang Salita ng Diyos!

B –Salamat sa Diyos!

Aleluya

Mt 4:19

B –Aleluya! Aleluya!

Sumunod kayo sa akin at kayo’y aking gagawing katambal ko sa tungkulin. Aleluya! Aleluya!

Mabuting Balita *Lu 5:1-11*

Sa simula pa lamang ng kanyang misyong apostoliko, nabighani na ni Hesus ang mga tao sa kanyang mga turo at milagro. Ngayon nama’y pagkakataon nina Simon Pedro para masak-sihan, sa mahimalang huli ng isda, ang presensiya ng Diyos sa Gurong taga-Nazaret.

P –Ang Mabuting Balita ng Panginoon ayon kay San Lucas

B –Papuri sa iyo, Panginoon!

Noong panahong iyon, nakatayo si Hesus sa baybayin ng Lawa ng Genesaret. Pinagkalipumpunan

siya ng napakaraming tao na ibig makarinig ng salita ng Diyos. May nakita siyang dalawang bangka sa baybayin; nakalunsad na ang mga mangingisda at naghuhugas ng kanilang mga lambat. Lumulan siya sa isa sa mga bangka at hiniling kay Simong may-ari nito, na ilayo nang kaunti sa tabi. Naupo siya sa bangka at nangaral sa mga tao.

Pagkatapos niyang magsalita ay sinabi kay Simon, "Pumalaot kayo at ihulog ang mga lambat upang manghuli."

Sumagot si Simon, "Guro, magdamag po kaming nagpagod at wala kaming nahuli! Ngunit dahil sa sinabi ninyo, ihuhulog ko ang mga lambat."

Gayon nga ang ginawa nila at sa dami ng kanilang huli ay halos magkansisira ang kanilang mga lambat.

Kaya't kinawayan nila ang kanilang mga kasamahang nasa ibang bangka upang patulong, at lumapit naman ang mga ito. Napuno ang dalawang bangka na halos lumubog.

Nang makita iyon ni Simon Pedro, siya'y nagpatirapa sa paanan ni Hesus at nagsabi, "Lumayo po kayo sa akin, Panginoon, sapagkat ako'y makasalanan."

Nanggilalas siya at ang kanyang mga kasama dahil sa dami ng kanilang huli; gayon din sina Santiago at Juan, mga anak ni Zebedeo, na mga kasosyo ni Simon. At sinabi ni Hesus kay Simon, "Huwag kang matakot. Mula ngayo'y mamamalakaya ka ng mga tao." Nang maitabi na nila ang kanilang mga bangka, iniwan nila ang lahat at sumunod kay Hesus.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B – Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-tao siya lalang ng Espiritu Santo, ipinanganak ni Santa Mariang Birhen. Pinagpaka-sakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Laluluklok sa kanan ng Diyos

Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P – Sa harap ng mabigat at palangiang pangangailangan sa mga pari sa ating mga pamayanan, pakumbaba nating idulog ang ating mga kahilingan sa Panginoong bukal ng lahat ng pagpapala. Maging tugon nati'y:

B – Panginoon, alalahanin Mo ang iyong bayan!

* Para sa buong Simbahang Katoliko, na bangka ni Pedro: Nawa patuloy na mangaral si Hesus sa mga bansa gaya nang siya'y nabubuhay pa rito sa lupa. Manalangin tayo! **B.**

* Para sa Santo Papang sumunod kay Simon Pedrong mamamalakayang taga-Galilea: Nawa magbunga ang kanyang misyong apostoliko sa pamamatnubay ni Hesus, ang Dakilang Mamamalakaya. Manalangin tayo! **B.**

* Para sa mga pari at mga kasama nila sa kanilang misyon: Nawa maging masunurin sila sa turo ni Hesus at maging tapat sila sa kapakanan ng kanilang mga kawan. Manalangin tayo! **B.**

* Para sa mga nahirang maging pari ng Simbahan: Nawa malugod silang tumugon at magsumikap sa mabuting gawa hanggang sa dulo ng kanilang buhay. Manalangin tayo! **B.**

* Para sa lahat ng mambabatas at mga nanunungkulan: Nawa magkaroon sila ng lakas ng loob at talinong manguna sa pag-iingat at pagtatanggol sa buhay laban sa kultura ng kamatayan. Manalangin tayo! **B.**

* Para sa lahat ng tao: Nawa kanilang igalang ang kabanalan ng buhay ng tao mula sa paglilahi rito hanggang kamatayan at tulungan ang lahat ng nagsisikap sa gani-

tong pagpapahalaga. Manalangin tayo! **B.**

* Para sa ating pamayanan at para sa bawat isa sa atin: Nawa maipakita natin ang ating pagpapahalaga sa gawa ng ating mga pari't kanilang mga katulong at tulunga't ipagdasal natin sila. Manalangin tayo! **B.**

* Tahimik nating ipagdasal ang ating mga pansariling kahilingan. (*Tumigil saglit.*)

Manalangin tayo! **B.**

P – Panginoong Diyos, bukal ng aming pag-asa at kaligtasan, patuloy Mo kaming pagkalooban ng maraming banal na katulong ni Hesus sa pagpapastol upang malugod at tapat Ka naming mapaglingkuran. Isinasamo namin ito sa ngalan ng Panginoon naming si Hesus.

B – Amen!



P – Manalangin kayo. . .

B – Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P – Ama naming Lumikha, ang pagkai't inuming narito ay iyong ginawa upang mapalakas kaming mga mahihina. Ipagkaloob mong ito ay aming mapagsaluhan bilang pakikinabang sa buhay mong pangmagpakailanman sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo V

P – Ama naming makapangyarihan, tunay ngang marapat na ikaw ay aming pasalamatan.

Ikaw ang lumikha sa tanan. Ikaw ang nagtakdang magkaroon ng gabi at araw, gayundin ng tag-init at tag-ulan. Ikaw ang humubog sa tao bilang iyong kawangis na mapagkakatiwalaang mangasiwa sa daigdig. Ikaw ngayo'y pinaglingkuran sa pagganap sa pananagutan ng iyong pinagtitiwalaan sa pamamagitan ng Anak mong mahal.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B– Santo, santo, santo . . .

Pagbubunyi

B –Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.

PAKIKINABANG



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos . . .

Paanyaya sa Pakikinasabang

P– Ito ang Panginoong Hesus, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinasabang

(Ipahayag lamang kung walang awiting nakahanda.)

Ang D'yos ay pasalamat na pag-ibig n'ya sa tanan. Pagkai't inuming tunay na may dulot kasiyahan ang sa ati'y kanyang bigay.

Panalangin Pagkapakinabang

P– Ama naming mapagmahal, sa pagkai't inuming pagkakaisa ang ibinibigay, kami'y niloob mong makapakinabang. Kaisa ni Kristo kami nawa'y makapamahay upang makapamunga nang may kagalakan para sa kapakanan ng aming kapwa tao sa sanlibutan, sa pamamagitan niya kasama ng Espiritu Santo magpasawalang hanggan.
B– Amen!

PAGWAWAKAS



P– Sumainyo ang Panginoon.

B– At sumaiyo rin!

P– Magsiyuko kayo at ipanalangin ang pagpapala ng Diyos. *(Manahimik saglit.)*

Iadya nawa kayo ng Panginoon sa lahat ng kasamaan.

B– Amen!

P– Tibayan Niya nawa ang inyong pananampalataya at pag-ibayuhin ang inyong sigla para sa lalong masigasig na pagli-

lingkod sa ating pamayanan.

B– Amen!

P– Tulungan Niya nawa kayo sa inyong mga pagsisikap at gantimpalaan kayo sa mabuti ninyong gawa sa lahat.

B– Amen!

P– Pagpalain kayo ng makapangyarihang Diyos: Ama, Anak, at Espiritu Santo.

B– Amen!

P– Humayo kayo sa kapayapaan upang mahalina at paglingkuran ang Panginoon.

B– Salamat sa Diyos!

Mga Katulong ng Dakilang Mamamalakaya

Tunay na kamangha-mangha marahil para sa mga matagal nang mamamalakayang tulad nina Simon Pedro ang gayong pambihirang huli ng mga isda. Una rito'y kay-tagal na silang naglamay sa paghihintay ng magandang huli ngunit nabigo lamang sila. At kung kailan mataas na ang araw, at di sukat akalain ng sino mang mamamalakayang makahuhuli sila ng kahit man lamang maliliit na isda, noon pa naganap ang malaking huling ikinagulat ng lahat. At ito'y dahil lamang ginanyak ng taga-Nazaret si Simon Pedrong maglatag ng mga lambat sa gayong alanganing oras . . .

May kakaiba sa gayong tagapangalang – *pambihira o dakilang kapangyarihan*. Si Simon ang unang nakapansin nito. Gayundin, nakadama siya ng nadarama ng mga kaluluwang tapat sa harap ng supernatural: isang malalim na kamalayan ng kanyang pagkamakasalanan at pagiging di karapat-dapat. Kaya nga, nagwika siya: “Lumayo po kayo sa akin, Panginoon, sapagkat ako'y makasalanan!” *(Lu 5:8)*. Halos walong siglong una rito, si Isaias man ay nakadama ng gayon sa nasaksihan niyang pagpapakita ng Diyos sa Templo *(Isa 6:5)*. Sukat ngang sagilahan ng pagkasindak ang isang taong tapat sa maaaring gawin ng isang Banal sa isang makasalananang nilalang.

Ngunit di ibig ni Hesus manindak ng mga tao. Agad niyang inalala si Simong nanginginig na noon sa takot. At higit pa. Ang himalang kanyang ipinakitang ay siya lamang simula. Iyon ay tanda ng isang higit pang dakilang magpapatuloy na mangyari hanggang sa wakas ng panahon. Ang gayong mahimalang huli ng mga isda ay isang propesiya: Si Simon at ang kanyang mga kasama't magiging kasunod ay makikibahagi sa misyon ni Kristong mamamalakaya ng mga tao *(sangguniin Lu 5:10)*, alalaong baga'y magliligtas sa kanila sa nakamamatay na kapangyarihan ng mga puwersa ng kasamaang sinasagisag ng dagat.

Samakatuwid, ang gayong himala ay di lamang pagpapasalamat ni Hesus kay Simon sa pagpayag nitong siya'y mangaral buhat sa kanyang bangka. *(Sangguniin Lu 5:13)*. Iyon ay bahagi ng maingat na planong ihatid ang pagliligtas ng Diyos sa sangkatauhan sa pamamagitan ng pakikipagtulungan ng mga hamak at makasalananang nilalang na gaya nina Simon Pedro; mga taong gaya ng Santo Papa at mga Obispo; mga taong tulad natin.

Ang mahimalang “huli,” alalaong baga'y ang pagliligtas ng mga tao, ay patuloy sa mundo, sa loob ng maraming siglo, sa kabila ng kahinaan ng mga mamamalakaya. Patuloy ito sapagkat ito ay gawa ng kapangyarihan ng Diyos; ang gawa ng pag-ibig at tivala ng Diyos. Sa kabila ng Kanyang kapangyarihan at kabanalan, hindi Niya tinatawaran ang ating hamak na pakikipagtulungan.

Lahat tayo'y nasa mapagligtas na bangka ng Simbahan. Lahat tayo'y kabahagi ng pagliligtas ni Kristo. Ngunit kabahagi rin tayo sa misyong tumulong kay Hesus sa pagliligtas ng iba, pagkat salamat sa kanya, tayo ma'y mga “tagapagligtas” din sa pamamagitan ni Simon Pedrong puno ng plotang tagapagligtas ng Diyos.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • **Telefax:** 894-5241 • **Website:** www.wordandlife.org

• **E-mail:** marketing@wordandlife.org, wordandlifepublications@gmail.com • **FB:** Word & Life Publications

• **Editorial Team:** Fr. S. Putzu, C. Valmonte, Sr. F. Santos, SMI, G. Ramos, R. Molmog, D. Daguio, V. David • **Illustrations:** A. Sarmiento, B. Cleofe • **Circulation:** F. Edjan